

Datum: 17.04. 2026.

Broj: 02-06-1058

TI BiH pisao Domu naroda PS BiH: Predloženi kandidat za direktora APIK-a ne ispunjava uslove za tu poziciju

SARAJEVO, 17. april 2026. – Transparency International u Bosni i Hercegovini (TI BiH) uputio je dopis delegatima Doma naroda Parlamentarne skupštine BiH u kojem upozorava da je upitna zakonitost i integritet predstojećeg imenovanja direktora Agencije za prevenciju korupcije i koordinaciju borbe protiv korupcije (APIK), koje će biti razmatrano na sjednici u ponedjeljak. U dopisu se skreće pažnja na činjenicu da prvorangirani kandidat Alen Halep nije dokazao da ispunjava uslove propisane konkursom, jer je kao dokaz o radnom iskustvu na rukovodećim mjestima u odgovarajućoj oblasti, priložio iskustvo rukovođenja vlastitom firmom koja se bavi proizvodnjom struje.

Radi se o preduzeću „Vrbas-energija“ d.o.o. Donji Vakuf, koje posjeduje malu hidroelektranu Torlakovac i po finansijskim izvještajima sve vrijeme imalo je samo jednog zaposlenika. Kako je uslov za poziciju direktora APIK-a najmanje pet godina radnog iskustva na rukovodećim poslovima u odgovarajućoj oblasti, TI BiH smatra da rukovođenje ovakvim preduzećem nema dodirnih tačaka sa prevencijom i borbom protiv korupcije, a sa druge strane se rukovođenje firmom koja ima samo jednog zaposlenog ne može smatrati relevantnim iskustvom za upravljanje jednom od najvažnijih institucija za prevenciju korupcije.

Privatna firma u vlasništvu Alena Halepa preuzela je 2015. godine dozvole za proizvodnju električne energije u MHE "Torlakovac" i do 2020. dobijala je državne podsticaje za proizvodnju struje. Status kvalifikovanog proizvođača koji prodaje energiju Elektroprivredi BiH ima do 2041. godine.

Dodatnu zabrinutost izaziva činjenica da je Halep od 2015. godine zaposlen u samoj Agenciji kao državni službenik, dok je istovremeno vlasnik i direktor privatnog preduzeća, iako Zakon o državnoj službi u institucijama BiH jasno propisuje da službenik ne može obavljati dodatne aktivnosti bez odobrenja.

Izveštaj o utvrđivanju rang-liste kandidata za imenovanje direktora APIK-a razmatraće se na sjednici Doma naroda 20. aprila. TI BiH apeluje na delegate da osiguraju zakonitost imenovanja, te da se prije odluke izvrše sve neophodne provjere relevantnosti iskustva kandidata koji je predložen za direktora, imajući u vidu da je u dosadašnjoj proceduri ovo propušteno. TI BiH ističe da je neophodno osigurati da na čelo jedne od ključnih institucija zaduženih za borbu protiv korupcije i zaštitu prijavitelaca bude imenovana osoba koja prije svega ispunjava sve zakonske uslove, a zatim i posjeduje puni profesionalni integritet.